

Fasnacht 2026

R
u
e
c
h
e

I
n
f
o



merci

d o r f p l a t z r u e c h e - p r a t t e l e . c h

Inhaltsverzeichnis

Vorwort	3
Aktivi Mitglieder	4
Apèro	5
echline Rückblick	6
Umzüge / Kontaktadresse	9
Klatsch & Tratsch	11
Plakettechaschte - lweihig	15
Gönnerbeitrag / QR Code	18/19



merci

d o r f p l a t z r u e c h e - p r a t t e l e . c h

Vorwort

Liebi Gönner und Fründe vo de Dorfplatzrueche

isch s`Vereinsläbe nit ständig vo neue Sache bestimmt?

Mir isch das in Sinn cho, wo ich mir Gedanke zum Vorwort gmacht ha.

Darf ich euch nit jedes Joor irgendöpis Neus vom Dorfplatzruecheläbe mitteile?

Dere Linie blib ich treu, au wenn s'Eint oder Ander fremdbestimmt worde isch.

Das mir das Joor zum erste Mol mitem komplett neue Dach fahre, händ ihr jo scho im letschte Ruech Info chönne läse.

Denn händ mir müesse e neu Stammeiz sueche, will jo s'Gehrenacker leider zue gange isch.

Mitem Clubhuus vom SV Augst sind mir zum Glück fündig worde.

Und wenn scho, denn scho, so händ mir dänkt, denn mache mir's doch grad richtig und händ au grad e neue Plakette-Chaschte dört ufghängt (läset drzue dr Bricht im Rueche Info).

Ebefalls neu und das isch nit uf eusem Mischt gwachse, müesse alli Wageclique ihri Wäge alli 3 Joor go prüefe, zum das sogenannti BESIBE z`becho (das händ mir natürlich vorbildlich erledigt).

Zuedem isch au neu d`Azahl Aktivi ufem Wage, mir sind leider nur no vier Erwachseni plus eis Chind, aber mir säge eus lieber Qualität statt Quantität.

Drfür isch bi de teilnehmende Umzüg inklusive Apéro am Sunntig alles glich blibe.

Mir blibt euch nur no wie alli Joor gueti Gsundheit und e kurzfristigi Zyt bis am Sunntig

22. Hoornig 2026 z`wünsche und es grosses MERCI für euri joorelangi Treui und Unterstützig säge.

Im Name vo de Dorfplatzrueche

Dr Obmaa Thomi



merci

d o r f p l a t z r u e c h e - p r a t t e l e . c h

Aktivi Mitglieder



Thomas

Petra

Adrian

Ronald

Tiziana

Markus

Luca

merci

d o r f p l a t z r u e c h e - p r a t t e l e . c h

Apèro am Fasnachtssunntig

Wenn:	Sunntig 22.Hoornig (Februar) 2026
Wo:	Flint's Kleintierpraxis, Hauptstrooss 19
Zyt:	Nachem Umzug (ca. am 4i)
Wer:	Alli Gönner, Fründe und Bekannti vo de Dorfplatzrueche



merci

d o r f p l a t z r u e c h e - p r a t t e l e . c h

e chline Rückblick 1

Tuet dr Wind fescht bloose, goht's Böögg Verbrenne in d `Hose

Das Joor mir müesse do drzue stoh
hämer sujettechnisch unseri Region verlo
mir händ gschtudiert und gschtudiert vieli Stunde
aber leider numme es Sujet vo Züri gfunde
mir tüent's aber de Zürcher huldige
sie sind wäge dem schlächte Wätter die Schuldige
denn es weiss jo jedes Chind
s'Wätter bestimmt s'Verchlöpfe vom Grind
wobi mir säges ganz im Vertraue
me sött jedem Zürcher eins an Grind annehau.
Aber zrugg zum Thema vo unserer Wahl
Für d'Zürcher isch es scho katastrophal
freue sich Monate lang uf's Böögg-Verbrenne
tüent wie wild in dr Stadt umerenne
den am sechsi Zobe isch es passiert
und dr allerletschti Zürcher het's kapiert
«Tuet de Wind fescht bloose
goht's Böögg Verbrenne in d'Hose»
Drum ghörsch au numme dr Sächsilüüte-Marsch
und s'Böögg-Verbrenne isch am Arsch
doch Optimischte sind's ganz unbestritte
tüent glich umme unverbrennti Schitterhufe rite
und d'Appezeller als Gaschkanton
stönd jetzt do wie en Clown.
Nachem Hüle, wo d'Zürcher wieder es bitz chönne lache
froge sie sich:» Was cha me jetzt mache?»
Dr Böögg muess brenne das isch klar
also mache mir's doch im Appezell wie wunderbar
also schnell plane und organisiere
das me sich numme halbwegs tuet blamiere.
Denn am 22. Juni 2024 isch es sowit
es chunnt für d'Zürcher die schönschti Zyt
und fertig isch ändli ihres Leide
s'Böögg-Verbrenne findet statt im schöne Heide
ufere Wiese stoht er voller Pracht

e chline Rückblick 2

die Double händ nomol e Schitterhufe gmacht.
Apropos schitter, nei ich ha keins kiff
aber bim Böögg-Verbrenne het's nonstop gschiff
drum will dä cheibe Hufe au nit brenne
«Tja wenn's lauft den lauft's» das muesch erkenne.
Aber no besser, isch das Zuekunft?
Keini Ritter vonere Zürcher Zunft
drfür rite sie, mir findes liebenswärt
ume Schitterhufe uf Stäckeprüd.
Denn endlich gsehsch langsam Flämmli
und Zürcher freue sich riesig nämli
es chunnt guet, dass darf me do nenne
dr Böögg fangt wüerkli afo brenne
und Böller leische ihre Teil drzue
fertig also mit dr Rued
Stück für Stück wird er zerfetzt
aber er macht langsam, s'wird nit ghetzt
denn stoht numme no s' Gstell mitem Grind
jetzt verchlöpft er den gli, aber bitte gschwind
aber nei, es chunnt anders, uns tuets freue
und Zürcher tüent's langsam bereue
vor 30 Joor isch Basel Gaschkanton gsi, das isch nit gloge
damals isch dr ganz Böögg ufe Bode gfloge
jetzt sind mir in Appezell Usserrhode
drum fliegt au numme dr Grind ufe Bode.
Denn nach 31 Minute und 27 Sekunde dr leschti Knall
und erledigt isch dä Fall
unser Fazit vo dere ganze Gschicht
das isch eifach und ganz schlicht
s'ganz Joor schlächts Wätter und e schlächte Summer
danke Zürcher ihr machet uns immner nur Chummer
aber das Joor wird's besser, das wirsch erkenne
will mir Prattler dr Schneemaa tüent verbrenne
drum müend ihr s'schöne Wätter au nit go sueche,
dass verspräche euch Euri Dorfplatzrueche.

merci

d o r f p l a t z r u e c h e - p r a t t e l e . c h



vorbereitige Weihnachtsmärkt 25

Umzüge und Kontaktadresse

Umzüg wo d'Dorfplatzrueche a z'träffe si:

Sunntig 22. Hoorinig 2026	14:00 Uhr	Umzug Prattele
Mäntig 23. Hoorinig 2026	14:00 Uhr	Umzug Fränkedorf
Frytig 27. Hoorinig 2026	15.00 Uhr	Umzug Prattele (Chinderumzug)
Samschtig 28. Hoorinig 2026	15.00 Uhr	Schlussstraich Muttenz

Kontaktadresse:
Thomas Meier
Muttengerstrasse 35
4133 Pratteln
metorage@gmail.com

Meldet doch beim nächsten Umzug Eure neue Adresse, damit unser "Heftli" Euch wieder findet.

Änderungen an die Kontaktperson melden



merci

d o r f p l a t z r u e c h e - p r a t t e l e . c h



Fasnacht 25



Mittagessen Wagenbau 26

Klatsch & Tratsch 1

Eusi Gönner ob die Alte oder die Neue
tüent sich jedes Joor ufe Rueche Info freue
die Lektüre isch interessant und au gsund
egal ob für Frau, Maa, Chatz oder Hund.



Fürs BESIBE tüent Experte finde
isch euse unteri Tritt vom Wage es bitz zwit hinde
drum muess dört dra Reflektorband
dr Thomi nimmt das schnell in d'Hand
doch bim Bschtelle het er sich vertippt
drum händs 6 x 2 m statt 2 x 2 m gschickt.

Und wie jedes Joor
chunnt au wieder e Kaffi Vårs vor
doch das mol mir wüesses genau
dr erschti nit vom Wagenbau
es isch bim Wiehnachtsmärt Ufbau passiert
wo sich e Dorfplatzruech het e bitz blamiert
möcht sich an dr Maschine e Kaffi use lo
er druggt und druggt aber nüt will go
denn chunnt Hilf und er ghört;"Du arme Tropf,
du druggsch ufs Display probiers mitem Chnopf."

merci

d o r f p l a t z r u e c h e - p r a t t e l e . c h

Klatsch & Tratsch 2

Und will's so schön isch grad nomol Eine
ganz e zarte und e chleine
mir kenne Eine dä tuet warte und warte
isch scho fascht am durrestarte
es will eifach kei Kaffi usecho
mit Maschine istecke würds besser go.

“Alle guten Dinge sind drei”
dä isch aber dr letschti Schrei
tuet dr Glich e Kaffi useloh
und den dr Tisch eifach verloh
dr Wassertank wird leer wie toll
und dr Bächer isch übervoll.

Letscht Joor am Schneemaa ihorne
fangt das Debakel a vo vorne
dr Ron findet e Chäller im Zollmattwäg
drum isch er au spöter nüm so zwäg
chunnt zu später Stunde in d`Dorfturnhalle
Ui het eus Rueche dr Ron aber gfalle
tanzt zu ABBA licht und nit schwer
drum isch er jetzt au euse “Tanzbär”.

Wie alli Joor gsehsch eus Dorfplatzrueche
wenn mir gönd go Plakettevernissage bsueche
denn nachem Ässe und de leere Täller
si dr Ron, dr Thomi und s'Peti no in Lümmel Chäller
schnäll e Schlummi go neh, nit übertriebe
aber es isch nit numme bi Eim blibe
Eine trinkt Gprützte Wyse noch und noch
und meint:” ich ha es Glas im Loch.”
Bitz spöter meint s'Peti: ”ich has gseh,
ich ha jetzt voll ein im Tee.”

Klatsch & Tratsch 3

Mit KI tuet dir nit alles glinge
do drvo cha s'Tizi es Liedli singe
luegt im Internet wenn Morgestraich isch
und scho si die plante Ferie ufem Tisch
au en Usflug mit Bekannte stoht bevor
doch leider zeigt die Site s'falsche Datum, das isch wohr
Moral vo der Gschicht das tuet eus quäle
s'Tizi und dr Luca werde am Umzug in Muttenz fähle
das dr Wage nit so leer isch, het dr Thomi e Plan e schigge
er frogt am Larifari dr Luki vo de Gaudi Clique
dä sait spontan: "jo, aber Eins erlaub i,
ich stand ufem Wage im Kostüm vo de Gaudi."

Eusi Rubrik Klatsch und Tratsch isch nit nur für die Aktive dänkt
immer wieder wärde eus vo Gönner Missgschick gschänkt
so meint doch Eini: "Ich suech im Rueche-Info Stunde,
ha aber niene dr Izaligsschin gfunde."
Do meint dr Thomi: "Loos, zur Not
probiere doch mol mitem QR Code."

Die glichi Frau isch au an Apéro cho
und meint den frogend und nit froh:
"Ich cha studiere und studiere,
tue aber eures Sujet nit kapiere."
Dr Thomi meint: "Gang führe an Traktor, dört isch es Bild
und dört chasch s'Sujet läse ufem Sujetschild."

An dr Fasnacht 2024 het e Aktive 2 Goldplakette umegstreut
das het ihn denn gstört und er hets bereut
drum isch er letschti Fasnacht sehr sorgsam gsi
und het wüerkli bis am Schluss die Goldigi drbi
doch er isch zum Plakette verliere gebore
und het in Muttenz am Umzug d'Fränkedorfer verlore.

Bimene Wagenbau vom leschte Joor
die Gschicht isch den wüerkli wohr
bringt im Adrian si Fründin s'Auto an Wagebauplatz
läuft drvo und sait: "Tschüss Schatz!"
Nachem Wagenbau will er wegfahre, denn chunnts ihm in Sinn
dr Autoschlüssel liegt im Auto drin.

merci

d o r f p l a t z r u e c h e - p r a t t e l e . c h

Klatsch & Tratsch 4

Jedes Joor um d'Wiehnachtszyt
chunnt eusi Wienachtscharte per Poscht das isch dr Hit
die Charte wird vom Adrian kreiirt
und nachem verschicke wärde mir informiert
doch das Joor het mir wüsse nit wieso
dr Adrian selber kei Charte becho.

Am Wagenbau Kaffi useloh bi eusne Männer, do gsehsch Sache
Kapsle in d'Maschine, Chnöpfli drugge isch doch eifach und immer zum Lache
Dr Thomi lauft drvo und luegt nit drzue "Heieiei"
und scho gits e riese Sauerei
Au dr Megge eus Kaffi-Junkie, im Griff het er's nit
machts am Thomi noch und scho wieder gits e Sauerei "Igitigit"

Eusi liebi Schnydere, sie isch eifach wundervoll
übergit eus eusi Koschtüm am Bügel im Sagg, das isch ganz toll.
S'Peti tuet denn no jedem d'Utensilie und Sogge ine
nur dr Thomi gseht sie nit und rief: "Mini Sogge sind niene!"

Im Klatsch & Tratsch isch dr Thomi scho Duurgascht
das üsseret sich bi ihm scho fascht wie e Lascht
Drum tüent mir us Personeschutz das Joor sie Name nit immer nenne
aber jede wo die Värs liest, wird wohl erkenne
wer drmit gmeint isch, das isch jo klar
Hauptsach er bringt uns zum Lache, mir finde das wunderbar.

Plakettechaschte - Iweihig 1

Plakettechaschte- Iweihig Fritig 05. September 2025

Wie im Vorwort scho gschriben händ mir ändlich wieder e Plakettechaschte und eusi Zugsplakette dörfe hänge und müesse nümme im Schrank versuere.

Fast logisch, dass d'Dorfplatzrueche das natürlich mitere Plakettechaschte-Iweihig gfiert händ.

Und ebe so logisch, dass euse Obmaa sini Red in Värsliform gschriben und ghalte het.

Mir möchte euch die Red natürlich nit vorenthalte, denn es zeigt d'Gschicht vo eusne Plakettechaschte uf:

Am Umzug wird uns e Zugsplakette übergeh
die darf dr Obmaa mit heime neh
das händ mir aber nie so welle
drum cha ich euch das Gschichtli verzähle.
Sit Joore scho händ mir en Chaschte
zerst in dr Schützestube das tuet mi hüt no belaschte
si jede Obe dört inne ghockt
mit de Joore het das halt gstockt
und wo dr Wirt meint chunnsch au wiederemol
find ich das eigentlich nit so toll
drum sind mir am Samstag druf, das cha me verstoh
in d'Schützestube und händ dr Chaschte abegno.
Schnäll händ mir öpis neus gfunde
dört bi dr Schlaufe im Tramstübli unde
mitem Maurice sind's ganz tolli Zyte gsi
drum isch er hüt no bi eus als Gönner drbi



merci

d o r f p l a t z r u e c h e - p r a t t e l e . c h

Plakettechaschte - Iweihig 2

Leider het er denn mit wirte ghört
das het uns scho es bitzeli gstört.
Die neue Wirte händ farblich alles überholt
und euse Chaschte eifach wiss übermolt
au hets nit so ganz harmonisiert
drum händ mir dr Chaschte es zweits Mol abmontiert.
Denn Joore lang isch kei Chaschte me ghang
obwohl mir als Stammbeiz ins Gehrenacker sind gange
dr Megge het für dort en Chaschte welle baue
aber irgendwie het das nie richtig aneghaue
ich ha sogar vernoh und das isch nit gloge
ei Chaschte isch sogar usem Fänschter gfloge
aber vo dem Thema isch jetzt rue
denn s`Gehrenacker het jo zue.
Im Februar 25 händ sie do s`Clubhuus renoviert
und dr Thomi het sich nit geniert
frogt dr Präsi Bruno: «Mach jetzt kei Gschrei,
aber du hesch doch sicher no es Wändli frei?»
Er frogt: «Wieso muesch du es Wändli ha
und nei überall si denn wieder Sache dra.»
«Jo weisch ich finds toll und würd mi getraue,
do im Clubhuus e Plakettechaschte lo baue.»
Es paar Tag spöter han ich dr Bruno wieder gseh
und er sait: «Ich ha e tolli Idee!
Mir baue do am lgang e Wand ane
du chasch mini Gedanke sicher scho erahne?»
Rechts tüent mir denn e Garderobe installiere
und links chönnet ihr eure Chaschte montiere.»
Super, also schnäll mitem Megge plane
und scho chunnts erschte Material do ane.
Die Zwei fange a mit baue und tüent sich beeile
das git e Chaschte ganz e geile
denn ändlich isch er fertig, nit übertriebe
sogar mit de ibaute Plexiglasschibe.
Drum sind mir hüt do voller Stolz
und zeige euch dr Chaschte us Holz
drum Megge tue euses Fasnachthärz erfülle

Plakettechaschte - Iweihig 3

und «hopp, hopp» schnäll dr Chaschte enthülle.
Doch no öpis, Geri het mol ein useghaue
das würd ich mich nie getraue
sait zum Bruno: «Meinsch isch das schwer,
wenn dr Chaschte no belüchtet wär?»
So Sprüch muesch bim Bruno nur eimol deponiere
und scho het er afo s'Material organisiere
erfüllt dr Wusch dä liebi Maa
und scho sind die Liechter dra
drum säg i numme ganz eifach und schlicht:
«Plakettechaschte, es werde Licht!»
Jetzt zum Schluss no allne wo gholfe händ es riese Dank
und ich ha endlich wieder Platz i mim Schrank
jetzt isch aber dr gmütlich Teil dra
und mir stosse uf euse Plakettechaschte a.



merci

d o r f p l a t z r u e c h e - p r a t t e l e . c h

Gönnerbeitrag

Dorfplatzrueche Pratteln

IBAN CH45 0076 9439 9820 1200 1

Und wieder landisch uf dr Gönnerbeitrag-Site
die git's all Joor, das isch unbestritte
denn es weiss jedes Kind, dr Hund und au s'Schätzeli
Fasnacht mache, choschtet e chli Bätzeli
klar zahle mir Aktive öpis y
und au vom Wiehnachtsmärt chunnt öpis dry
das längt leider nit, dass isch eso
drum si mir um euch Gönner froh
den jede zahlt was er will
kei Franke isch zwenig oder zviel
Vo einere Sach chönne mir euch leider nit schütze
tüent doch bitte dr QR Code benütze
stohsch technisch vorere unbezwingbare Wand
drucksch dr Beitrag eifach imene Aktive in d'Hand
mir möchte uns jetzt scho e Mol bedanke
über jede überwieseni Gönnerfranke.



Stefan Häring

Geschäftsführer
Mobile: +41 79 671 37 70
haering@thommenmaler.ch

thommen maler ag | Ramlinsburgerstrasse 1 | 4415 Lausen
Telefon +41 61 901 20 40 | Fax +41 61 901 20 45
info@thommenmaler.ch | www.thommenmaler.ch

Bitte berücksichtigen Sie unsere Inserenten, denn Sie berücksichtigen auch uns.

merci

d o r f p l a t z r u e c h e - p r a t t e l e . c h

QR-Code Gönnerbeitrag

Dorfplatzrueche Pratteln

IBAN CH45 0076 9439 9820 1200 1



merci

d o r f p l a t z r u e c h e - p r a t t e l e . c h



SolBus AG

Zurlindenstr. 13, 4133 Pratteln
info@solbus.ch www.solbus.ch
+41 61 823 22 44



Gediegene Busreisen mit dem Culinaria Magnifica II

Ungestresstes Reisen in einem Bus, dessen Ausstattung keine Wünsche offen lässt – dies bietet das kleine Reiseunternehmen SolBus AG in Pratteln. Die Angebotspalette reicht dabei von Tagesfahrten in der Schweiz, Kurztrips in angrenzenden Ländern, bis hin zu ausgedehnten Rundreisen etwa nach Norwegen, in den Süden Englands oder Sizilien.

Details finden sich im neuen Katalog oder online.

merci

d o r f p l a t z r u e c h e - p r a t t e l e . c h

Hair & Beauty by Cornelia



Hauptstrasse 42 413 Pratteln Tel: 079/901 92 18 www.hair-cornelia.ch

merci

d o r f p l a t z r u e c h e - p r a t t e l e . c h



BIELSER HOF
Hauptstrasse 51, 4133 Pratteln
061 821 55 04, info@bielser-hof.ch
www.bielser-hof.ch

- > **Apéro, Raclette, Käsefondue oder Buurebrunch**
Für Ihren Anlass mitten im Dorf auf unserem Hof
- > **Wir liefern Fruchtkörbe an Firmen**
Diverse Früchte, je nach Saison
- > **Hunde und Katzen Futter**
Primafu Barf-Futter für Ihren Liebling
- > **Weihnachtsbaumverkauf**
ab dem 10. Dezember in der Hülften



im Rad

merci

d o r f p l a t z r u e c h e - p r a t t e l e . c h



vorbereitung Wiehnamtsmãrt 25



Bürgergemeinde Giebenach



Oberholzstübli

„Ihr Raum für jeden Anlass...“

in Giebenach

Auskünfte und Reservationen

Christian Venturini
079 889 57 00
ohs@bg-giebenach.ch